

NOMERO

Yogoigunkanira iseraereegi Sunaiku

1 ¹⁻³Impogini^a ishiriagakoigaka iseraereegi patiro shiriagarini iponiaigaara Ejipitoku. Impo yagana-kara kashiri 2 ogari kutagiteri 1 yogari Tasorintsi iniairi Moiseshi ikantiri: “Maika pogoigakerira maganiro iseraereegi gaveaigaatsirira iriaigakera iromanaigakempara, iriro pintentashita-kempa Aaron pogoigakerira. Antari pogoigakerira irashirikoni pogageigakeri iyashikigeiganakerira Iroven. Ario inkañoi-gake aikiro iyashikigeiganakerira Sumeon irashirikoni pogageigakeri. Ario pinkañoi-takeri aikiro iyashikigeiganakerira Jora kigonkero pintsotenkaigakeri maganiro iyashikigeiganakerira itomiegi Iseraere. Pogoigakerira maganiro surariégi, kantankicha yogari tekyarira irishiriaga-koige 20 iriro pinkante gara pogoigiri.”

Antari ikantakerira maika onti inake Moiseshi ivankoku Tasorintsi anta osarigagitetapaakera paitacharira Sunai.

Impo irirori itsatagakero ikantakeri-rira iatake yogoigakerira. Antari yogoigakerira maganiro onti inaigake kañorira maika oka:

Yogari irashi Iroven itsitikitakerira Iseraere onti inaigake 46,500.

Yogari irashi Sumeon onti inaigake 59,300.

Yogari irashi Gare onti inaigake 45,650.

Yogari irashi Jora onti inaigake 74,600.

Yogari irashi Isakare onti inaigake 54,400.

Yogari irashi Savoron onti inaigake 57,400.

Yogari irashi Eperain onti inaigake 40,500.

Yogari irashi Manaseshi onti inaigake 32,200.

Yogari irashi Vejamin onti inaigake 35,400.

Yogari irashi Iran onti inaigake 62,700.

Yogari irashi Asere onti inaigake 41,500.

Yogari irashi Nepetari onti inaigake 53,400. Maganiro ikaravageigaketyo 603,550.

Irantaigakerira irevitaegi

⁴⁷Kantankicha yogaegiri iyashikiiganakerira Irevi iriro pinkante tera irogoigeri, ⁴⁸ikantakeritari Tasorintsi Moiseshi ikantiri:

⁴⁹“Yogaegiri iyashikiiganakerira Irevi gara pogoigiri, ⁵⁰onti pinkantaigakeri impiriniventaigerora novanko ineginte-geigerora magatiro nantagetakarorira, irorotari nokogakagaigakeri naro inkañoigakempara maika. ⁵¹Tyarika

a 1.1-3 Numero *Números*. Oka sankevanti onti oniakotake yogoigunkanira iseraereegi akatovainirika inaigake, irorotari opaitantakarira Numero.

piaigake iriroegi tsokiageiganaerone iramaiganaerora intentagantaiganaemparora magatiro nantagetakarorira, impo tyarika pinaigakera iriroegi garatinkageigapaerone irovetsikageigapaerora. Onti irimagaigake kara aiñoni ironkuatakoigakemparora. Garatyo tyani aiñonitumatacha pashini terira iriro irevita. Tyanirika aiñonitankichane irogakenkanityo.”

*Impo yogari Tasorintsi iniairi Moiseshi intiri Aaron ikantaigakerira tyara inkantagakempa iseraereegi irimagageiganakera osarigagitetapaakera. Ikantaigakeri irogaigakerora ivanko niganki ironkuatakoigakemparora. Yogari irevitaegi iriro aiñonitasanoigakemparone. Yogaegiri itovaire terira iriro irevitaegi ontii-
intainakona irinaigake. Yogaegiri iyashikiiganakerira Jora intiegiri iyashikiiganakerira Isakare intiegiri aikiro irashiegi Savoron ontii-
irinaigake oatakara ikontetira poreatsiri okatinkatakotakera osotsimorote ivanko Tasorintsi. Antari irogagaiganakempara parikoti, iketyo ivaiganankitsine.*

Ikantakeri aikiro yogaegiri iyashikiiganakerira Iroven intiegiri iyashikiiganakerira Sumeon intiegiri irashi Gare irinaigakera oatakara kamatikya. Antari irogagaiganakempara parikoti, iriaiganaera maganiro, iriroegikya giaiganakerine ivaiganankitsirira. Impo irimaiganakempa irevitaegi iramaiganakerora ivanko Tasorintsi.

Yogari iyashikiiganakerira Eperain intiegiri iyashikiiganakerira Manaseshi intiegiri irashi Veamain irinaigake oatakara iatira poreatsiri. Antari irogagaiganakempara parikoti, iriroegi giaiganakerine irevitaegi.

Yogari iyashikiiganakerira Iran intiegiri iyashikiiganakerira Asere intiegiri irashi Nepetari irinaigake katonko. Iriroegi impogiiganankitsine.

Ikantakeri aikiro ontimakera ivanteraegite iyashikiiganakerira Jora

intiegiri itentaigarira ontiri aikiro pashini irashiegi iyashikiiganakerira Iroven intiegiri itentaigarira. Ario onkañota-kempa aikiro ontimakera irashiegi iyashikiiganakerira Eperain intiegiri itentaigarira ontiri aikiro pashini irashiegi iyashikiiganakerira Iran intiegiri itentaigarira. Impo tyarika irimagaigake kantaka irogaratinkakoigakerora. Antari irogagaiganakempara iramakoiganaero oketyo ivatakotanaatsine.

Impo iriroegi ario ikañogakero itsatagaigakerora magatiro ikantakeririra Tasorintsi Moiseshi.

Intagani tavageigankitsine ivankoku Tasorintsi iyashikiiganakerira Irevi

3 ⁵Impogini iniairi Tasorintsi Moiseshi ikantiri:

⁶“Pinkaemaigakerira maganiro iyashikiiganakerira Irevi pamaiganakerira inakera saserorote Aaron irimutakovageigakerira ⁷irovetsikageigakerora magatiro nokantakerira ovetsikakenkanira novankoku, ontii-
irovetsikaigake nokantakeririra Aaron intiegiri maganiro iseraereegi. ⁸Iriroegi negintegeigakerone novanko ontiri aikiro magatiro nantagetakarorira. Maganirotari iseraereegi nokantaigakeri ovetsikakenkanira novankoku, kantankicha gara maganiro yovetsikaigiro. Intagani vetsikagakerone iriroegi, ⁹iriroegitari nokogagaigake irimutakovageigakerira Aaron. ¹⁰Pinkantakerira Aaron intagani irirori pegankichane saserorote intiri itomiegi intiri aikiro iyashikiiganakerira impogini. Garatyo tyani pegumatacha pashini. Antari tyanirika pegankichane pashini irogakenkanityo.”

Nasareoegi

6 ¹Impo iniairi Tasorintsi Moiseshi ikantiri:

²“Pinkantaigakerira maganiro iseraereegi tyanirika kogankitsine

inasareotakera irashirikotashitakenara
impiriniventakerora nokogagetakerira.

³Gara yoviikumataro vino ontiri pashini-
page poiri. Gara yoviikumataro vinagare
ovetsikantunkanirira vino ontirika
pashini poiripage aikiro gara yoviikuma-
taro oani ova. Gara yogumataro
okyakikyarira okitsoki ontiri orogiri.

⁴Gara yogumataro maani ova irororika
okitsoki ontirika omeshina garatyo
yogaro. ⁵Ogari igishi gara yogaraima-
tiro, onti irogimonkakero kigonkero
aganaempara kutagiteri ikantakera
ganigera inasareotai. Antari inasareota-
kera kantakani irashirikotashitakenara,
gara yovetsikumati nokantavitakeririra.

⁶Aikiro gara yaiñonitumataro igamaga-
page. Ario inkañoigakempa imirinka
nasareoigankitsinerira, irirorika surari
ontirika tsinane.

¹³“Impogini aganaempara kutagiteri
ganigera inasareotai iripokake sotsimo-
roku novankoku ¹⁴iramakenara paniro
ovisha surari kametitasanotankitsirira
shiriagakotanankicharira patiro intagaka-
gantakenarira. Iramake aikiro tsinane
ovisha kametitasanotankitsirira. Ario
onkañotake irorori patiro oshiriagakota-
kempa. Iramakenaro ganiri nokisavitiri
ikañoavagetara. Iramakena aikiro paniro
ovisha antarini kametitasanotankitsirira
kameti noshineventakemparira. ¹⁵Aikiro
iramakotakena kantirichonkiku pan
terira onkonogempa opoegantarira, onti
ovetsikantakenkani turigopane shipetya-
panetasanotankitsirira onkonoganta-
kempa aseite. Aikiro iramake pashini
pan pairorira oentyatasanotake
intiritakero aseite intentagantakempa-
rora turigopane ontiri vino.

¹⁶“Impo yogari saserorote intagakenari
ovisha surari ontiri tsinane ganiri
nokisavitiri ikañoavagetara nasareotanki-
tsirira. ¹⁷Impo irimatakeri antarini
intentagantakemparora pan terira

onkonogempa opoegantarira kameti
noshineventakemparira. Irimatakeri
aikiro turigopane ontiri vino. ¹⁸Impogini
yogari nasareotankitsirira impieitakempa
sotsimoroku novankoku. Iragakero igishi
iokavokitakerora tsitsiku itagakara
ovisha antarini yamakenarira noshine-
ventakemparira. Ogari igishi ontitari
iokotagantakara arisano yashirikotashita-
kena nerotyo intagantakemparorira
intentagantakemparira ovisha. ¹⁹Impo-
gini yogari saserorote iragakero itsoketa
ovisha onkotunkanirira ontiri pan terira
onkonogempa opoegantarira ontiri aikiro
patiro pan entyatasanotankitsirira
irapagotagetakerira nasareotankitsirira
²⁰iroakogetakerora ton ton ton noneake-
rora impo irashintakemparora saserorote
intentagantakemparora imereta ontiri
itsoketa yoakerira noneakerora. Impogini
yogari nasareotankitsirira kametitake
iroviikaempara vino tenigetari inasareo-
tae.”

Tivorintsi ovetsikantunkanirira perata

10 ¹Impogini yogari Tasorintsi
iniairi Moiseshi ikantiri:

²“Povetsikakagantakera piteti tivorin-
tsi. Inti ovetsikantakenkani perata
impitankakenkanira maritiyoku. Onti
ovetsikashitakenkani intivotakoigenka-
nira iseraereegi irapatoitaigempara
ontirika iriaiganakera parikoti. ³Antari
ontivotenkanira pitetiro maganirosano-
tyo iripokaigake viroku pampatoitaigake-
rira sotsimoroku novankoku. ⁴Antari
patirorika ontivotakenkani ario pinkante
intagani pokaigankitsine itinkamiegi.
⁵⁻⁷Antari ontivotenkanira onti onkantati-
gaenkagetakempa. Pinkogerika irapatoi-
takempara onti ontivotakenkani
onkantatigaenkatakempa. Antari ontirika
pinkogake irimaiganaerora aikiro
iriaiganaera parikoti ario onkañotake
aikiro ontivotakenkani onkantatigaenka-

takempa. Antari pintivotakoigakeririka iriaiganakera ario iriaiganake naigankitsirira oatakara ikontetira poreatsiri, impo omataempirika aikiro ontivotaenkanira iriaiganake naigankitsirira oatakara kamatikya. Ario pinkañoigakeri maika pinkogakerika iriaiganakera onti pintivotakoigakeri, ⁸kantankicha intiegi tivotakoigerine saseroroteegi. Kantakani pinkañoigakempara maika kigonkero piyashikivageiganakera.

⁹"Impogini piaigakera pintimaigakera anta Kanaanku intimaigake kisaigakempirira iroverajaigakempira, viroegi piaigake pomanataigakempara. Antari piaiganakera oketyo ontivotakenkani tivorintsi kameti nonkemaigakempira nompugamentaigakempira ganiri yagaveaigimpi. ¹⁰Ario onkañotake aikiro pishineigempara ontiri ontimera piviesetaegite ontivotakenkani. ...Kantakani pinkañoigakerora maika kigonkero piyashikivageiganakera kameti nosureigaempiniri, nantitari kantankitsi, narotari Tasorintsi-sanorira, nanti Pitinkamiegi."

Iponiaiganakara iseraereegi Sunaiku

¹¹Impogini yaganakara kashiri 2 ogari kutagiteri 20 ogaenokanaa menkori pamankakarorira ivanko Tasorintsi, oivaiganairira yogiaiganairora iriroegi. ¹²Onti iponiaigaka osarigagitetapaakera paitacharira Sunai iaigakera osarigagitetapaakera paitacharira Paran. Ario kara okusotapaake menkori. ¹³Antari iaiganakera itsatagaigakero magatiro ikantakeririra Tasorintsi Moiseshi, ¹⁴nerotyo iketyo ivaiganankitsi iyashikiiganakerira Jora itentaiganakarira iyashikiiganakerira Isakare intiegiri aikiro irashiegi Savoron yamakoiganakerora ivanterae-gite. Yogari itinkamiegi iyashikiiganakerira Jora onti ipaita Naason. Inti itomi Aminaravo, ¹⁵Yogari Natanaeri itomi Soari inti itinkamiegi iyashikiiganakerira

Isakare. ¹⁶Yogari Eriave itomi Eron intitinkamiegi iyashikiiganakerira Savoron. ¹⁷Impo otsokiagetanaaganira ivanko Tasorintsi ario iaiganake iyashikiiganakerira Jereson intiegiri iyashikiiganakerira Merari yamaiganairora, iriroegitari okatinkaigake iramaiganakerora.

¹⁸Impo irirokya maiganankicha iyashikiiganakerira Iroven itentaiganakera iyashikiiganakerira Sumeon intiegiri aikiro irashiegi Gare yamakoiganakerora ivanteraegite. Yogari itinkamiegi iyashikiiganakerira Iroven onti ipaita Erisori. Inti itomi Sereori. ¹⁹Yogari Seromieri itomi Sorisarai intitinkamiegi iyashikiiganakerira Sumeon. ²⁰Yogari Eriasapa itomi Ereori intitinkamiegi iyashikiiganakerira Gare. ²¹Impo igenaneyatyogiaiganakeri iyashikiiganakerira Koate yamaiganakerora magatiro nagetatsirira tsompogi ivankoku Tasorintsi. Impo yogonkeigapaakara ineaigapaakeri maiganakerorira ivanko Tasorintsi mataka yovetsikaigairo ovashi yogageigapaakero.

²²Antari iaiganakera iyashikiiganakerira Koate irirokya maiganankicha iyashikiiganakerira Eperain itentaiganakarira iyashikiiganakerira Manaseshi intiegiri aikiro irashiegi Vejamin yamakoiganakerora ivanteraegite. Yogari itinkamiegi onti ipaita Erisama. Inti itomi Amiori. ²³Yogari Gamariere itomi Perasori intitinkamiegi iyashikiiganakerira Manaseshi. ²⁴Yogari Aviran itomi Jereoni intitinkamiegi iyashikiiganakerira Vejamin.

²⁵Impo irirokya impogiiganankitsi iyashikiiganakerira Iran itentaiganakarira iyashikiiganakerira Asere intiegiri aikiro irashiegi Nepetari yamakoiganakerora ivanteraegite. Yogari itinkamiegi iyashikiiganakerira Iran onti ipaita Aieseri. Inti itomi Amisarai. ²⁶Yogari Pajiere itomi Okaran intitinkamiegi iyashikiiganakerira Asere. ²⁷Yogari Aira itomi Enan intitinkamiegi iyashikiiganakerira Nepetari.

²⁸Onti ikañoigakero maika itsatagai-gakerora ikantaigakerira Tasorintsi tyara inkantaigakempa iriaiganakera.

³³Antari iponiaiganakara otishiku Sunai onti imagaiganake mavati avotsiku. Ogari kajonaki onantagetarira piteti mapu itsirinkantagetakarira Tasorintsi iroto ivatakotanankitsi kameti irogoigakeniri tyarika kara irapishigopireaikakempa. ³⁴Ogari menkori inantakarira Tasorintsi okantakani apamankakoigakeri kutagiteriku.

Tasorintsi yogivarigateigakeri tsitsi iseraereegi

11 ¹Impogini yogaegiri iseraereegi ikisavageigakatyo kara osarigagitetapaakera ineigakera yatsipereavageigakera, kantankicha Tasorintsi ikemaigakerityo ovashi ikisashiigakeri yogivarigateigakeri tsitsi kara okaratakera imagaigakera otagagarantaigakerira. ²Impo iriroegi itsarogavageiganaketyo kara ovashi ikantaigakeri Moiseshi iriniaventaigakerira. Impo yogari Moiseshi iniaventaigakeri ovashi otsivakagetanai tsitsi. ³⁵Onti inaigake Kivorotataavaku impo iponiaiganakera kara iaigakera Aseroteku. Ario inaigake kara.

Maria intiri Aaron iniashinaigakarira Moiseshi

12 ¹⁻⁴Yogari Moiseshi pairotyo ikametitanovanogeti teratyo inkisantumate. Tera intimumate kañotakemparineririra irirori. Kantankicha impogini ogari iritsiro paitacharira Maria otentakari iariri paitacharira Aaron oniashinaigakarira oneaigakera onti yagi tsinane etiope,^b irorotari yagi. Impo okantaigi: “¿Matsi intagani Moiseshi ishineventaka Tasorintsi iriniakerira? ¿Matsi tera irishineventaigajae aroegi

aikiro?” Kantankicha ikemaigakeroty Tasorintsi impo ikantiri Moiseshi intiri Aaron ontiri aikiro irorori: “Piaigakera paratinkaigapaakera sotsi novankoku.”

Ovashi iaigake. ⁵Impo yogari Tasorintsi yaguitake menkoriku inake sotsimoroku. Impo ikaemaigakeri Aaron ontiri Maria yashirikoigakerira ⁶ikantaigiri: “Maika kemasanoigena. Antari intimeri pashini kamantantatsirira onti nonkoneatimoteri onkañotimotakempari igisanireku. Ario nonkañotagakeri aikiro noniakerira. ⁷Kantankicha teratyo nonkañoteri maika Moiseshi, irirori intitari nomperane tsatagasanotirorira magatiro nokogagerira yogotagaigakerira nokogagaigakerira nashintaigakemparira. ⁸Irirori onti noniakeri aiñoni ikemasanotakenaty. Tera ario nonkantakogetero tatarika oita, onti nogikoneatasanotakeneri, impo ineakena tyara nokanta. ¿Matsi tera pintsaroge piniashinatarira?”

⁹Impo ikisamatanakatyo akya itsatai. ¹⁰Ogari menkori ikenantapaakarira amereanaa ivankoku. Ogari Maria ogaty okenake oveseganaka pairatamake kara vesegasemataka. Ishonkavetanaa Aaron ineiro vesegasemataka oga ikenake itsarogavagetanake ¹¹ikantiri Moiseshi: “Notinkami, atsi gara pikisashiigana. Novetsikaigake terira onkametite, ontitari noniashiigakaro kogapage. ¹²Atsi maika pintsarogakagakemparora incho ganiri okañotari igamaga ikamira omotiaku iriniro imechovetaka atake yoveseganaka.”

¹³Impo yogari Moiseshi iniakeri Tasorintsi iniaventakera iritsiro ikantiri: “Maika viro Tasorintsi, nokogake povegaerora.”

¹⁴Yogari Tasorintsi ikantiri: “Antari inkisakerora iri intoaterora ovoroku ¿matsi gara opashiventa 7 kutagiteri?

Maikari maika ariotyo onkañotakenkani ontigankankenirara parikoti 7 kutagiteri impogini ompokae onkonoiigaempira.”

¹⁵Ovashi otigankunkani Maria parikoti onakera anta 7 kutagiteri. Irireroigi iseraereegi tera añaokya iriaige, onti yogiaiganairo onkonoiigaemparira. ¹⁶Impogini okonoiigaarira ario iaiganake iponiaiganakara Aseroteku yogonkevageigaka osarigagitetapaakera paitacharira Paran.

Moiseshi itigankake 12 iriaigakera ineageiguterora Kanaan

13 ¹Impogini yogari Tasorintsi ikantiri Moiseshi:

²“Pintigankaigakera surariegi iriaigakera ineasanoigakiterora kipatsi Kanaan, irorotari nompagakempirira impogini pintimantaigakemparira. Pintigankake paniro itinkami iyashikiiganakerira Iroven, ario inkañotake iyashikiiganakerira Sumeon pintigankake paniro itinkami, ovashi pintsotenkaigakeri maganiro iyashikiigeiganakerira paniropage itomi Iseraere.”

³Impo yogari Moiseshi itsatagakero ikantakeririra itigankaigakerira. Imirinkaegi inti itinkamiegi iseraereegi.

¹⁷Antari itigankaigakerira ikantaigavakeri:

—Piaige pineaigakiterora Kanaan tyara okantaka. Pinkenaiganakera Negeveku piaigakera otishipageku ¹⁸pineventakoigakemparora. Aikiro pineageigakerira timaigankitsirira kara irirorikara surariigatsirira ontirika tera, aikiro akatovainirikara inaigake. ¹⁹Aikiro pineasanoigakerora tyara okantagitetaka, ariorika okametigitetake ontirika tera. Aikiro pineaigakera tyara ikantaigaka itimaigakera. Ariorika itimashiigakaro kogapage ontirika inegintetaktasanoigaka itantatsaitakoi-gaka. ²⁰Aikiro pineasanoigakerora irororika ametantagetarira pankrintsi

ontirika tera, aityorika inchatoshi ontirika tera. Gara pitsarogaigi pagageiganakera shivokagetankitsirira anta.

Antari ikantaigakerira maika atake irakavagetanai ova. ²¹Impogini iaigake ineageigakerora magatiro. ... ²³Impo yogonkeigaka otsateniku paitacharira Esekori. Ario kara yovatuakoigake pamankutiro ova ikompitakoigakero inchakiiku itentagantaigakaro geranara ontiri aikiro igo. ²⁵Impogini yagataigakera ineageigutirora magatiro ario ipigaiganaa. Onti ipeguntevageiguta 40 kutagiteri. ²⁶Antari yogonkeigaara Kareshiku Paranku ikamantageigapakeri magatiro. Inti ikamantake Moiseshi intiri Aaron intiegiri aikiro maganiro iseraereegi. Aikiro iokotagageigakeri yamageigakerira ²⁷ikantaigiri:

—Noaigakiti anta pitigankaigakenara. Arisanoniroro okametigitetasanovageiti. Nero oka timantagetakarorira. ²⁸Kantankicha yogaegiri timantaigarorira isurariva-geigityo kara. Apatogematakatyo tovai pankotsi, aikiro inegintetasanoigakatyo itimaigakera itantatsaitaktasanoigakatyo. Aikiro ario inaigake kara iyashikiiganakerira Anako. ²⁹Irirokyo amarekoegi onti itimaigake Negeveku. Yogaegiri ititaegi, jevoseoegi intiegiri amoreoegi onti itimaigake otishiku. Yogari kananeoegi onti itimaigake otsapiaku omaraani nia ontiri aikiro otsapiaku Jororan.

³⁰Kantankicha yogari Kareve ikantagakeri maganiro inkemisantaigakera. Onti yapatoitaigaka inakera Moiseshi. Impo ikantaigiri:

—Tsametyo aigakera ashintaigakemparora, pairotari avisaigake aroegi agaveantaigakera, avisaigakerityo iriroegi.

³¹Kantankicha yogaegiri giaigutiririra ikantaiganaketyo:

—Garatyo agaveimaigi aigera anta agaveaigakerira, pairotari yavisavageigakai iriroegi isurariigakera.

³²Impo ariompatyo yomintsarogaiganakeriri itovaireegi ikantaigakerira:

—Antari noaigakitira noneaigakitirora intityo goitankicha gantaigatsirira. Maganiro iriroegi imarapagerikatyo inaiwake igatsantsapagerikatyo kara.

³³Noneaigakitiri iyashikiiganakerira Anako imarapagetyo kara, kantakatari iriroegi ikañoigakarira itsitikiegi. Naroegi maanikinityo nonavageigake. Noneaigakatyo ontinirikatyo nokañotimoigakari katitori, yavisavageigakenatari iriroegi.

Iseraereegi ikisaiganakerira Tasorintsi

14 ¹Impogini maganiro iseraereegi ikaemavaitanaketyo kara iragai-ganakara. Iraganinkaigakatyo tsitenigeti-ku ovashi okutagitetanake. ²Impo iniaashinaiganakari Moiseshi intiri Aaron ikantaigi: “iAriometyo nonkamaigakeme Ejipitoku ontirika nonkamaigakeme aka osarigagitetaakera! ³¿Tyara okantakara yamaigakenara aka Tasorintsi irogaka-gantaigakenara impo ashintaigakenka-nira notsinanetsiegi intiegiri notomiegi? Maikari maika nompigaiganaetyo Ejipitoku.” ⁴Impo ikantavakagaiganaka: —Tsame agaigakera atinkamiegi intentaiganajaera Ejipitoku.

⁵Impo yogari Moiseshi intiri Aaron yompatakaseiganakatyo kara inaiwakera maganiro. ⁶Yogari Josoe itomi Non intiri Kareve itomi Jepone itisarajaigamanakeroty imanchaki ikenkisuraiganakara, iriroegitari tentaigakaririra aigutatsirira ineasanoigakitirora Kanaan. ⁷Impo iniaigakeri ikantaigiri:

—Antari noaigakitira noneasanoigakitirora okametigitevatagiratyo kara.

⁸Yogari Tasorintsi itasanoigakaitari ishineventaigakaira. Irirotyto tentaigana-kaene impaigakaerora oga kipatsi kametitasanotankitsirira, ⁹irorotari nonkantantaigakempirira maika gara pikisaigiri, aikiro gara pipinkaigiri

timaigankitsirira anta, patirotyo agaigakeri agaveaigakerira, tenigetari iragamaakoigaempari Tasorintsi, antiegitari itentaigaka ipugamentaigakaira. iGara pipinkaigiri!

¹⁰Kantankicha iriroegi ogatyo isariaiganakari impitankaigakerira. Impo ineavagakeri Tasorintsi ishimpokirerenkamatapaaketyo ivankoku ¹¹iniapaakerira Moiseshi ikantiri:

—Yogaegi iriroegi yotsimananaiganani chapi, tyarikatyo ikantaigakara tera inkematsaigena, ineavagetakaroty novetsikimogeigakerira posante terira oneimagetenkani. ¹²Maikari maika nonkisashiigakemparityo nompogereaigakerira. Virokya nonkavintaavagetake nogitovaigaveigakerira piyashikiiganakerira, pairotyo iravisavageigakeri iriroegi.

¹³Kantankicha Moiseshi ikantiri:

—Antari pagaigaatirira anta Ejipitoku povetsikagematityo terira oneimagetenkani pogikoneatakerora pagaveane. Maikari maika pimpogereaigakeririka inkemakoigaerityo Ejipitokunirira ¹⁴impoinkamantaigakeri yogaegi timaigankitsirira kara Kanaanku. Irirroegi ikemakoigakempitari pairani pikantakani pitentaigakari yogaegi iseraereegi piniaigakeri aiñoni. Ogari menkori pinantakarira kantakani apamankakoigakerira, aikiro piivaiganakeri menkoriku ontiri tsitsiku. ¹⁵Maikari maika inkemakoigakempirika pimpogereaigakerira inkantaiganake maganiro: ¹⁶‘Onti ineakera Tasorintsi tera iragavee iramaiganakerira anta kipatsiku ikashigakagaigakaririra, nerotyto ipogereantaigakaririra osarigagitetaakera.’

¹⁷‘Irorotari maika Notinkami, atsi pineakagaigakerira maganiro arisano pagaveakero magatiro, pagaveaketari pogavisaakotantakera, aikiro pagaveake pinkisashitantakempara, pikantaketari ¹⁸tera pinkatimaigari pinkisashiigempa-

rira vetsikaigatsirira terira onkamentite. Pairotyó pitsarogakagantavageta. Pimagisantakoigakeri kañovageigacharira vetsikageigatsirira terira onkamentite pogavisaakoigakerira, kantankicha yogaegiri terira inkogaige inkematsaigakempira gara pogavisaakotumaigiri, ontityo pinkisashiigakempari, pimaiganakerityo itomiegi, ivisariegite intiri iyashikiiganakerira. ¹⁹Maikari maika atsi pintsarogakagaigakemparira pogavisaakoigakerira, pairotari pitsarogakaganta pogavisaakoigakeri ikyasanyara pagaigaati Ejipitoku kigonkero maika.”

Tasorintsi ikisaiganakerira iseraereegi

²⁰Impogini yogari Tasorintsi ikanti:

—Maika nontsatagakero pikantakerira nogavisaakoigakerira, ²¹kantankicha nokogake nonkamantakempira nantitari Tasorintsi, aikiro nanti vetsikagetakerorira magatiro timantagetakarorira kipatsi, nerotyó maika nonkantake ²²⁻²³garatyó ineimaigiro oga kipatsi nokashigakagagakaririra yashikiiganakeririra. Gara ineimaigiro maganiro yogaegi neaigave-takarorira nagaveane novetsikagetakera terira oneimagetenkani anta Ejipitoku ontiri aikiro osarigagitetapaakera, yotsimajaigakenatari tovaiti kara tera inkematsaigena. Garatyó ineimatiro paniro yogaegi tsi-mananaigakenarira. ²⁴Intagani neakerone nomperane Kareve. Irirori ikantatigakatari teranika ario inkañoigempari itovaire, onti ikematsatanovagetakena. Iriro pinkante neakerone, aikiro maganiro iyashikiiganakerira iri ro shintakemparone.

²⁵Maikari maika iroroventi ariotari itimaigakeri amarekoegi intiegiri kananeoegi kara pampaku pimpigaiganaetyo kamani piaigaera osarigagitetapaakera oatakara Kiraamonkiari Inkaare.

²⁶Impo iniai aikiro ikantiri Moiseshi intiri Aaron:

²⁷—Tyarika nokemaigirini chapi iniashinaiganara yogaegi iseraereegi.

²⁸Maika pinkantaigakerira: 'Ikanti Tasorintsi: Nantitari Tasorintsi, iroroventi pikogavintaigakera pinkamaigakera aka osarigagitetapaakera ariotyó pinkamai-gake, nokemaigakempitari piniagakera. ²⁹Maganirosanotyó antariniegi niashinai-gakenarira inkamaketyo aka osarigagitetapaakera. Intaganivani timaigaatsine tekyarira irishiriagakoigempa 20. ³⁰Arisanotyó nokantake gara pineimaigiro oga kipatsi nokashigakagaigavetakempirira nokantakerira pashintaigakemparora. Intagani neaigakerone Kareve itomi Jepone intiri Josoe itomi Non. ³¹Yogaegiri pitomiegi iriro pinkante neaigakerone. Pikantaigavetakatyó irashintaigakenkanira anta, kantankicha naro nontentaiganakerityo irashintaigakemparora pimanintaigakerira viroegi. ³²Viroegiri ontityo pinkamaigake aka osarigagitetapaakera. ³³Yogari pitomiegi onti iranuiintevageigake osarigagitetapaakera 40 shiriagarini iratsipereavageigaketyo kara, viroeginiroo kañotagantaigakeri. Kantaka inkañoigakempara maika kigonkero pimpogereaiganakempara viroegi pinkamaigakera osarigagitetapaakera. ³⁴Ariotari okañotakari okyara iaigakitira neaigutirorira Kanaan ipegaigakita 40 kutagiteri. Maika ariotyó onkañotakempa aikiro pantsipereavageigaketyo 40 shiriagarini pineaigakera tyara nokantaigiri terira inkogaige inkematsaigenara. ³⁵Maikari maika nokantake maganiro kisaigakenarira terira inkogaige inkematsaigakenara inkamaigaketyo aka osarigagitetapaakera impogereaigakempara, nantitari kantankitsi. Naro nanti Tasorintsi.'

Ikamaigakera 10 neaigutirorira Kanaan

³⁶⁻³⁷Impogini yogaegiri itigankaigakerira Moiseshi ineigakiterora Kanaan

ikomutagaiganaka ikamaigake, irirotari gamagaigakeri Tasorintsi ineakera yomintsarogaigakerira maganiro iseraeegi ikantaigakerira gara yagaveaigi iriaigakera Kanaanku irashintaigakemparora ovashi ikenaigake maganiro ikisaiganaka iniashinaiganakarira Moiseshi. ³⁸Pitenivanisano inai Josoe itomi Non intiri Kareve itomi Jepone.

Ipatimaiganunkanira iseraeegi

³⁹Impogini yogari Moiseshi ikamantagakeri maganiro iseraeegi ikantakerira Tasorintsi ovashi ikenisureavageiganaka iriroegi. ⁴⁰Impo okutagitetamanakera yovetsikavageigamanaka ikantaigi:

—Maikari maika mataka vetsikaiganakana noaigakera anta kipatsiku ikantakerira Tasorintsi noaigakera, novetsikaigaketari terira onkametite nokantaigavetakara gara noaigi.

⁴¹Kantankicha yogari Moiseshi ikantaigiri:

—¿Tyara pikantaigakara tera pintsatagaigero ikantaigakempirira Tasorintsi? Maika piaigavetakempa garatyo kametikya piaigi. ⁴²Garatyo piaigi, tenigetari intentaigaempi Tasorintsi. Piaigavetakempa ontityo irogaigavakempi kisaigakempirira. ⁴³Ariotari inaigakeri kara amarekoegi intiri kananeoegi irogaigavakempityo. Teranika pinkogaigepinkematsaigerira Tasorintsi nerotyo maika garatyo itentaigaimpi.

⁴⁴Kantankicha iriroegi ariompatyoshintsiiiganakeri iaigaketyo. Yogari Moiseshi teratyo iriate, aikiro oga kajonaki onantagetarira pitetiro mapu itsirinkantagetakarira Tasorintsi teratyo oatakote.

⁴⁵Impo yogonkeigavetakara anta otishiku onti ipokashiigavakeri amarekoegi intiegiri kananeoegi timaigatsirira kara otishiku yomanataigakarira impo yagaveaigakeri. Yogipigaigavairi ipatimaiganakeri yogavageigakitiri Oromaku.

Yogunkanira tsmatankitsirira kutagiteriku apishigopireantaganirira

15 ³²Antari inaigakera iseraeegi osarigagitetapaakera ineavitunkani paniro itsimatakera kutagiteriku apishigopireantaganirira. ³³Yogari neaviigakeririra yamaigakeneri Moiseshi intiri Aaron intiegiri aikiro maganiro iseraeegi. ³⁴Iriroegi yashitakoigakeri, tekyatanika irogoige tyarika inkantakenkani. ³⁵Impo yogari Tasorintsi ikantiri Moiseshi: “Irogakenkanityo, onti iramanakenkani parikoti irapatoventaiganakemparira maganiro impitankaigakerira kigonkero inkamanaera.”

³⁶Impo ario ikañoigakero itsatagaigakerora ikantakeririra Tasorintsi Moiseshi yamaiganakeri parikoti ipitankaigakerira.

Ikogakera Koree iokakerira Moiseshi

16 ¹⁻²Impogini aïño paniro iyashikitanakerira Irevi paitacharira Koree. Inti tomintari Isare itomi Koate. Irirori itentaigakari mavani iyashikiiganaakerira Iroven ikisaigakerira Moiseshi ikogaigavetakara iokaigakerimera. Yogari iyashikiiganakerira Iroven onti ipaigakalratan. Yogari irapitene onti ipaita Avirame. Inti tomintagari Eriave. Yogari yomavatakarira onti ipaita On. Irirori inti tomintari Perete. Impo iriroegi itentaigakari aikiro pashini 250 itinkamiegi iseraeegi pairorira ipinkatsatasanoigagani, intiegitari itentaigarira itovaireegi itinkampage iseraeegi yapatoitapiniigara. ³Maganiro iriroegi iatashiigakeri Moiseshi intiri Aaron ikantaigiri:

—Pipegaiganiroro chapi notinkamiegi. iMaikari maika pinkantenityo! Maganirotari ario nokañoigakempi viro, ikogakagaigakenatari naroege aikiro Tasorintsi nantavagetimoigakerira. ¿Matsi paniro itentaigakempi viroegi?

Intentaigakenaty maganiro nareogi aikiro. ¿Tyara okantakara pikogavintsai-gakera tsikyata pimpegaigakempara notinkamiegi maganiro nareogi?

⁴Iroto ikemavakera Moiseshi yompa-takasematanakaty ⁵inianakerira Koree intiri itentaigakarira ikantaigiri:

—Kamani ineakagaigakempi Tasorintsi tyani yashintaka, aikiro tyani ikogakagake irantavagetimotakerira aikiro isaserorotetakerira. Tyanirika ikogakagake irirotyo saserorotetankitsine. ⁶Kamani pagaigake paniropage opiatantaganirira kasankapaneri otagaganira ⁷pimpiaigakerora tsitsimenki pintagaigakenerira Tasorintsi kasankapaneri aneagakera tyani ikogakagake isaserorotetakerira, impo ganige pikañoigaa maika.

⁸Impo ikantaigiri aikiro:

—Viroegi iyashikiiganakerira Irevi atsi kemisantanoigena. ⁹Pine Tasorintsi ikavintsaavageigakempi ikogakagagakempi pantavagetimoigakerira ivankoku, aikiro piniaventaigakerira maganiro iseraereegi pintagaigakenerira ipiraegi iramaigeneririra Tasorintsi. ¿Matsi tera pishineigempa pineagakera ikañoigakempira maika? ¹⁰Intaganitari viroegi irevitaegi yashirikotagaigake pantavagetimoigakerira. ¿Matsi atanatsi pikogaigira pashini pisaseroroteigakera? ¹¹Ironiroro pikogaigake viroegi intiegiri yogaegi pitentaigakarira neroty pikisashiigakarira Tasorintsi. Yogari Aaron ¿matsi tyara ikantakara neroty pikisaigakerira irirori aikiro?

¹²Impo iriokya ikaemakagantaigake Iratan intiri Avirame, kantankicha iriroegi teraty inkogaige iriaigera, ontityo ikantaigake:

—Garaty noaigi. ¹³¿Matsi tera pishine-tempa pineakera pagaigaatanara notimai-gavetakara anta okametigitetasanotira pitentaigakenara aka osarigagitetaapaakera pogamagaigakenara? Maikari maika

atanatsiniroro pikogakera pimpegakempara nogoveenkariege pashintasanoigakenara. ¹⁴Maikari maika ¿tyara pitentaiganara okametigitetira? ¿Tyatityora maika pipaiganara kipatsi nashintaigakemparora? Teniroro pimpumaigena opankishiataganira ova. ¿Matsi pineake ario pagaveaigakena pamatavinaigakenara maganiro? Garaty noaigi.

¹⁵Ovashi ikisamatanakaty Moiseshi ikantiri Tasorintsi:

—Garaty pishineventumatari ipira iramaigakerira intagaigakempirira. Narori teraty nagutaigumateri paniro iashinogite, aikiro tera tyara nonkantumaigeri.

¹⁶Impo ikantiri Koree:

—Maikari kamani pimpokakera viro pitentaigakerira maganiro pitentashii-gakarira pikisaigakenara. Pimpokaigakera aka ivankoku Tasorintsi. Yogari Aaron ariotari irinakeri irirori aikiro aka. ¹⁷Paniropage pagaigake opiatantaganirira kasankapaneri otagaganira pimpiaigakera kasankapaneri pamaigakera. Maganirosanoty pamaigake. Yogari 250 pitentaigakarira, iramaigaketyo irirori. Aikiro viro pamakera intiri aikiro Aaron iramake irirori.

¹⁸Impo ario ikañoigakero. Okutagitetanakera yagaiganake opiatantaganirira kasankapaneri otagaganira ipiaigakero tsitsimenki ontiri kasankapaneri iaigake ivankoku Tasorintsi yamaiganakerora yaratinkaigapaake sotsimoroku itentaigakarira Moiseshi intiri Aaron. ¹⁹Yogari Koree mataka ikaemakagantaigakeri maganiro iseraereegi iripokaigakera inkisaigakerira Moiseshi intiri Aaron neroty ipokantaigakarira maganiro ivankoku Tasorintsi yapatoitaigakera. Impo yogari Tasorintsi ikoneatimoigakeri maganiro ishipokirerenkanakera ²⁰ikantiri Moiseshi intiri Aaron:

²¹—Mereaganake kara nonkisashiigakemparira maganiro nompogereaigakerira.

²²Kantankicha iriroegi yompatakaven-taiganakarityo ikantaigiri:

—Tasorintsi, virotari ganiaigiririra maganiro matsigenkaegi, ¿ario pampa-raigakeri maganiro pimpogereaigake-rira?, panirotari kañotankicha.

²³Irirori ikantiri Moiseshi:

²⁴—Irovento atsi kantaigeri maganiro iramereaiganakera irontainai-ganakemparora igamisapankoegite Koreae intiri Iratan intiri aikiro Avirame.

²⁵Impo irirori iatanake inaiagakera Iratan intiri Avirame. Yogaegi itinkamiegi iseraereegi yogiaiganakeri.

²⁶Impo ikantaigiri maganiro:

—Pamereaiganakera pontainai-ganemparora igamisapankoegite yogaegi terira inkametiige. Gara pitsagatakotumai-giri yashintageigarira kameti ganiri pitentagaiganaari inkamaigakera inkisavii-gakerira Tasorintsi ikañovageigakara.

²⁷Impo iriroegi yamereaiganaka yontainai-ganaka. Yogari Iratan intiri Avirame ikonteiganake yaratinkaiga-kera sotsimoroku itentaigakarora itsinanetsite intiegiri aikiro maganiro itomiegi. ²⁸Impo ikanti Moiseshi:

—Maika iroro pogotantaigakempa iriro kantakena Tasorintsi novetsikakera magatiro novetsikagetakerira, tera tsikyata naro novetsikashitemparo.

²⁹Antari inkamaigera yogaegi onkañota-kempa okamaganira, ontirika intimake gamaakoigakemparineririra gara ikamaigi, irovento teratyo iriro kantenane Tasorintsi nonkañotakempara maika. ³⁰Kantankicha antari ontirika irovetsikake Tasorintsi terira oneimaten-kani onkirankanake kipatsi onigaigakeri iriaigake kanianiro savipatsaku intenta-gaiganaemparora yashintageigarira ario pinkante pogoigake inti yotsimajaigake Tasorintsi.

³¹Impo irorotyo yagatanakera iniakera okirankamatanaketyo kipatsi yaratintiita-

kera ³²onigaigakeri otentagantaigakeri igamisapankoegite ontiri magatiro yashintageigarira. Onigaigakeri aikiro ironampiriaegi Koreae ontiri magatiro yashintageigarira iriroegi aikiro. ³³Maga-niro iaigake kanianiro savipatsaku impo apataakoigakeri kipatsi ovashi ipegaigaka. ³⁴Maganiro iseraereegi ikemaigavakerira ikaemavaitanakera suugn suugn ishigaigamatanakatyo parikoti ikantaiganakera: “Kantakarika-tyo onigaigirika aroegi aikiro.” ³⁵Impo oponiimotakari Tasorintsi tsitsi ogaigaka-rira yogaegi 250 tagaigavetankicharira kasankapaneri ivankoku Tasorintsi.

⁴¹Impogini okutagitetanakera maganiro iseraereegi ikisaigakeri Moiseshi intiri Aaron ikantaigiri:

—iViroegini-ro-ro gamagaigakeri yashintaigakarira Tasorintsi!

⁴²Impo yapatoventaiganakarityo kara ikisaigakerira, kantankicha ishonkaiga-vetanaka ivankoku Tasorintsi ineaiguta-rotyo menkori inantakarira Tasorintsi apamankakaro ivanko. Yogari Tasorintsi ishimpokirerenkanake ikoveenkavageti-tyo kara. ⁴³Yogari Moiseshi intiri Aaron iaigake anta ⁴⁴impogari Tasorintsi iniakeri Moiseshi ikantiri:

⁴⁵—Mereaiganake parikoti pontainai-ganakemparira maganiro yogaegi nonkisashiigakemparira nompogereaiga-kerira.

Impo iriroegi yompatakaventaigana-karityo kara ⁴⁶ovashi inianake Moiseshi ikantiri Aaron:

—Piatekario ganake opiatantaganirira kasankapaneri otagaganira. Impo paganakera tsitsimenki nankitsirira anta itagantaganiriraku piratsi pimpiatake-rora pintagakera kasankapaneri pamakotanagerora inaiagakera maganiro iseraereegi ganiri ikisaviigiri Tasorintsi ikañovageigakara, kisanakatari maika mataka atake yogamagaiganakeri.

⁴⁷Impo irirori yagapanuti ishiganaka inaikera maganiro ineaigapaakeri atake ikamagarantaiganake. ⁴⁸Ishiganaka yarantinkakera ikaraiganakera kamaiganankitsirira itagapaakeneri Tasorintsi kasankapaneri kameti ganiri atanatsi ikisaviigirira ikañovageigakara ovashi ario ikaraigapaake tenige atanatsi inkamaigae. ⁴⁹Maganiro kamaigankitsirira ikaravageigaketyo 14,700, kantankicha antari yogogunkanira tera ario intentagantayenkani kamaigankitsirira itentaigakarira Koree. ⁵⁰Impo ineakera Aaron tenigera inkamaigae ario iatai inakera Moiseshi sotsimoroku ivankoku Tasorintsi.

Opeshiganakera igotikiro Aaron

17 ¹Impogini ikantiri Tasorintsi Moiseshi:

²“Pinkantaigakerira itinkamiegi iseraeeregi iramaigakera paniropage igotikiro. Yogari itinkamiegi iyashikiiganakerira Jora iramake irashi. Ario inkañotake itinkamiegi iyashikiiganakerira Isakare iramake irirori irashi. Ario inkañoi-gakempa maganiro itinkamiegi iyashikiiganakerira itomiegi Iseraere iramageigake paniropage. Magatiro onti onake 12. Antari iramaigakerora impaigakempiro pintsirinkagetakerora ivairoegi yashikiiganakeririra, ³kantankicha ogari irashi Aaron gara pitsirinkiro Irevi, onti pintsirinkake ivairo Aaron. ⁴Impo pogagetakero tsompogi novankoku onira kajonaki onantagetarira pitetiro mapu notsirinkantagetakarira, ariotari kara noniaigimpiri. ⁵Impo tyanirika nokogakagake isaserorotetakeri ompeshiganake igotikiro ontegata-nakera ovashi nogemisantaigakeri maganiro ganigera iniashinaigaimpi.”

⁶Impo irirori ikamantaigakeri ovashi yamaigakeneri paniropage igotikiro ipaigakerira. Magatiro onake 12. Ogari irashi Aaron ario onake irorori kara. ⁷Impo yogari Moiseshi yogagetakero anta

tsompogi ivankoku Tasorintsi. ⁸Impo okutagitetanakera iatamanake ineapaakero igotikiro Aaron peshigake tegamaimatake, aikiro timake okitsoki arementera irakake. ⁹Impo inoshikagetanakero magatiro yamanakerora sotsi iokotagaigakerira shintageigakarorira. Maganiro iriroegi ineaigakero igotikiro Aaron opeshiganakera impo yagageiganairo irashi yamaigana-¹⁰irora. ¹⁰Impo yogari Tasorintsi ikantiri Moiseshi: “Manaero irashi Aaron pogate-¹¹rora anta tsompogi novankoku onakera kajonaki. Kantakani onakera kara kameti irogoigakeniri maganiro yogaegi kisaigake-ririra iriro nokogakagake isaserorotetakera ompote pogemisantaigakerira ganiri nogamagaigairi.”

¹¹Impo irirori itsatagasanotakero magatiro ikantakeririra Tasorintsi.

¹²Kantankicha yogaegiri iseraeeregi ikantaigiri Moiseshi: “iMaikaniroro nompogereagempa maganiro, ¹³imirin-katari aifonitankichanerira ivankoku Tasorintsi inkamake! iNonkamaigakerorokari maganiro!”

Nia imperitakutirira

20 ¹Impogini iaiganake maganiro iseraeeregi yogonkeigaa osarigagitetapaakera paitacharira Sun imagaigapaake kara Kareshiku. Inti yogonketantagaa kashiri 1. Ario okamake Maria okitataagani kara. ²Impogini ineaigakera tera ontime iroviikaigakemparira ikisaiganaka ovashi yapatoitashiigakari Moiseshi intiri Aaron ³ikantaigiri Moiseshi:

—iAriometyo nonkamaigakeme nonten-tagaijanaemparira notovaireegi ikisashii-gakarira Tasorintsi! ⁴Gamerakari pitentai-gana aka osarigagitetapaakera nonkamai-gakera naroege intiegiri nopiraegi.

⁵Okyara gametyo pagaigaatana Ejipitoku pamaigakenara aka terira onkametigitete. Tyatirityo otimira maika pankirintsipage. Mamerityo igo. Ario okañotaka ova ontiri

geranara irorori mamerityo. Irorokonatyo timankitsine nia noviikaigakemparira.

⁶Impo yogari Moiseshi intiri Aaron iaigake ivankoku Tasorintsi yompataka-seventaigapaakari. Yogari Tasorintsi ogatyo ikenake ishimpokirerenkimoiganakeri ⁷ikantiri Moiseshi:

⁸—Paganakerora pigotikiro pampatoitaigakerira maganiro iseraereegi piatakera piniakerora imperita ineasanoigakempira iriroegi. Impo oga onkenake nia onkonteatanake iroviikagakempara iriroegi intiri ipiraegi.

⁹Yogari Moiseshi itsatagakero ikantakeririra Tasorintsi yaganakero igotikiro

¹⁰itentanakari Aaron iaiganake imperitaku yapatoitaigakeri maganiro ikantaigakerira:

—Maika, viroegi terira pinkematsatan-taige, atsi pinkemaigakenara maika. ¿Matsi tatoita pikogaigake? ¿Ario nogikonteaga-kempiro nia aka imperitaku?

¹¹Impo yakontsaanake ipasatiro imperita igotikiroku. Imatutaaroty o aikiro. Ogaty okenake okonteatanake nia omaraarikaty kara ovashi yoviikagaka maganiro, aikiro yogiigakeri ipiraegi. ¹²Kantankicha yogari Tasorintsi ikantiri Moiseshi intiri Aaron:

—Maikari maika teranika pinkematsa-tasanoigena kameti ineiaigakeniri maganiro arisano nagaveavageti garaty viroegi tentaigari yogaegi aigankitsine-rira Kanaanku.

Ikogaigavetakara iseraereegi inkenaiaganakemera igipatsiteku eromitaegi

¹⁴Impogini yogari Moiseshi itigankake niaventaigakerineririra iseraereegi iriniaventaiguterira inkantaigakiterira igoveenkariegite eromitaegi irogavisai-gakerira inkenaiaganakera igipatsiegi-teku. Impo iaigake ikantaigakerira:

—Ikantake pitovaire iseraereegi: ‘Pikemakoigakena natsipereavageiga-kera. ¹⁵Pairani yashikiiganakenarira

iaigake Ejipitoku impo itimuntevagei-gake anta ikisavintsavageigunkani kigonkero notimaiganakera naroege. Impo ario ikañotagaigakena naroege aikiro ikisavintsavageigakenara ¹⁶ovashi niragaigaka nokaemavavageigaketyo noniaigakeri Tasorintsi nokantaigake-rira impugamentaigakenara, impo ikemaigakena itigankakeri isaankariite itentaigaanara aka parikoti. Maikari maika ario nonaigapaake aka Kareshiku nochoenitakoigapaakaro pigipatsiegite. ¹⁷Maika nokogaigake pogavisaigakenara nonkenaiaganakera kara pigipatsiegiteku. Gara ario nokenaigi pitsamaireegiku, ario onkañotakempa pipankiigirora ova gara ario nokenaigi kara. Gara noviiku-taiganakempiro piniaegite pikigantashii-girira, ontityo nonkenaiaganake ogapokiniku avotsi. Gara noatumaigi parikoti, kantakatyo nonkenaiaganakera kara avotsiku ovashi navisaigakanakera.’

¹⁸Irirori ikantaigiri:

—Garatyo pikenaiigi aka. Pinkenaiga-kerika nomanataigavakempityo.

¹⁹Kantankicha iriroegi ikantaigiri:

—Nokantakeniroro onti nonkenai-ganake ogapokiniku avotsi. Antari noviikag-anakemparorika piniaegite ontirika nogitaiganakeri nopiraegi nompunaiga-naempityo. Atsi pogavisaigakenara, intagatitari nonkenaiaganakera.

²⁰Kantankicha irirori ariompatyo ikantanakeri:

—Nokantakempiniro gara pikenaiigi.

Impo ovashi yovetsikaiganaka iatashiigakerira iromanataigavakempa-rira. ²¹Yogari iseraereegi ineiaigakera tera inkogaige irogavisaigakerira ovashi ikenaiapanuti parikoti.

Ikamakera Aaron

²²Impogini yogaegi iseraereegi iponiai-ganaa Kareshiku iaiganake otishiku paitacharira Jore. ²³Ario onake kara

okaratakera igipatsiegite eromitaegi. Impo yogari Tasorintsi iniakeri Moiseshi intiri Aaron ikantaigiri:

²⁴“Yogari Aaron inkamake, gatanika iati Kanaanku, teranika pinkematsai-gena nokantaigavetakempira tyara pinkantaigakero pogikonteaigakerora nia imperitaku, onti pikisaiganaka. ²⁵Maika pintentanakerira piaigakera otishiku Jore pintonkoaiganakerora. Pintentanakerira aikiro itomi Aaron paitacharira Ereasare. ²⁶Impo pisapoka-getakerira Aaron yogagutashitarorira isaserorotetira irirokya pogagutan-taempa itomi, yogari Aaron inkamake-tari. Onti inkamake kara otishiku.”

²⁷Yogari Moiseshi itsatagakero ikantakeririra Tasorintsi. Iaigake itonkoaiganakero otishi Jore ineagavakeri maganiro. ²⁸Impo yogonkeigakara anta isapokakeri Aaron isaserorotetantarira irirokya yogagutake Ereasare ovashi ikamake Aaron kara otishiku. Impo yogari Moiseshi ipokai itentaari Ereasare. ²⁹Maganiro iseraereegi ineagakera ikamakera Aaron ikenkisureakoigakarityo kara kigonkero avisanaara 30 kutagiteri.

Igoveenkariegite Ararekunirira yomanataigakarira iseraereegi

21 ¹Impogini aiño paniro koveen-kari timatsirira Negeveku. Irirori inti igoveenkariegite kananeoegi timaigatsirira apatotara pankotsi paitacharira Arare. Impo ikemakoigavakerira iseraereegi ipokaigapaakera ikenantaigapaakarora avotsi atacharira Atarimeku yovetsikaiganaka iaiganakera yomanataigavakarira impo yagag-rantaigakeri yamaiganakerira yashintai-gakarira. ²Impo yogaegi itovaireegi ikantaigakeri Tasorintsi: “Ariorika pmutakoigakena nagaveaigakerira

yogaegi kananeoegi, nompogereaigakeri nompogetutaigakerira magatiro ivankoeigi.”

³Impo yogari Tasorintsi ikemaigakeri imutakoigakeri yagaveaigakerira ovashi ipogereaigakeri maganiro imaigakero aikiro ivankoeigi ipogetutaigakerira. Karari kara yagaveaigakerira ovashi opaitaka Oroma.^c

Maranke yovetsikantunkanirira verontse

⁴Impogini iaiganai aikiro iponiaiganakara kara Joreku ipigaiganaa oatara Kiraamonkiariku Inkaare ironkuaiganakemparora igipatsiegite eromitaegi ovashi iperaiganaka yanuiintevageigakera. ⁵Impo ikisaigakeri Tasorintsi intiri Moiseshi ikantaigiri:

—Pineavetaka game pagaigaatana Ejipitoku pogamagaigakenara aka osarigagitetapaakera. Mameritari aka nia, aikiro mameri nogaigakemparira. Omirinkaniroro nogunteiganaka manaa noperageiganakaro tera omposhinitumate.

⁶Impo yogari Tasorintsi itigankimoi-gakeri maranke kepigari yagaigakerira ovashi ikamagarantaigake tovaini kara. ⁷Impo ikantaigiri Moiseshi:

—Novetsikaigake terira onkametite nokisaigakerira Tasorintsi, aikiro nokisai-gakempira viro. Maika atsi piniakerira Tasorintsi pinkantakerira impegaerira maranke ganigeniri yagaigaana.

Ovashi irirori iniaventaigakeri.

⁸Impo yogari Tasorintsi ikantiri:

—Pagakera verontse povetsikakera maranke pogaratinkakotakerira, impo tyanirika iragake maranke inkamagutakeri ganiri ikami.

⁹Impo irirori yovetsikake yogaratinkakotakeri kara, nerotyo tyanirika yagake maranke ikamagutakeri ovashi tera inkame.

c 21.3 Oroma onti onkantakera “pogereasanomataka”. Nm. 14.45.

Iseraereegi yagaveaigakerira amoreoegi

¹⁰Impogini imaignairo aikiro iaiganaira. ... *Antari yogonkevageigakara pampaku Moaveku* ²¹itigankaigake niaventaigakerineririra iriniaventaiguterira inkantaigakiterira Seon igoveenkariegite amoreoegi inkante: ²²“Maika nokogaigake pogavisaigakenara nonkenaiganakera pigipatsiegiteku. Gara ario nokenaigi pitsamaireegiku, ario onkañotakempa pipankiigirora ova gara ario nokenaigi kara. Gara noviikutaiganakempiro piniaegite pikigantashii-girira, ontityo nonkenaiganake ogapokiniku avotsi ovashi navisaiganakera.”

²³Kantankicha irirori teratyo inkoge. Onti yovetsikanaka iaiganake yomanataigakarira anta osarigagitetapaakera Jaasaku. ²⁴Impo inti gaveantaigankitsi iseraereegi ovashi yagutaigakeri igipatsiegite ... ²⁵itimantaigakarora apatogetakara ivankoegi. ...

³²Impogini yogari Moiseshi itigankai-gake inegiteaigakiterora Jasere, impo yomanataigakari amoreoegi timaigatsirira kara yagaveaigakeri yogishigaigakerira itimantutaigakari apatogetakara ivankoegi. ³³Impogini irirokya iatashii-gake timaigatsirira Vasanku, kantankicha yogari igoveenkariegite itentashii-gakari maganiro itovaire yomanataigavakarira Erereiku. Yogari koveenkari onti ipaita Ogo. ³⁴Impo yogari Tasorintsi ikantiri Moiseshi: “Gara pipinkaigiri, nokogakagaigakempitari pagaveaigakerira irirori intiri aikiro itovaire pashintutaigakemparira igipatsiegite pinkañotagaigakemparira pagaveaigakerira koveenkari Seon Esevonkunirira.”

³⁵Impo yagaveaigakeri ipogereaigakerira irirori, itomiegi, aikiro maganiro timaigatsirira kara, teratyo intimumatae paniro ovashi yashintagetutaigakari igipatsiegite.

Varaka ikaemakagantakerira Varaame

22 ¹Impogini imaignairo aikiro iaiganai yogonkeigapaaka igipatsiegiteku moavitaegi. Imagaigapaake Jororanku okatinkatakotakera Jeriko. ²⁻⁴Yogari igoveenkariegite moavitaegi itsarogavagetanaketyo kara ikemakoigakeritari tyara ikantaigakeri amoreoegi. Ario ikañoigaka maganiro moavitaegi itsarogavageiganake ineaigakeritari itovaigavageigiratyo kara ikantaigakaririra itinkamiegi Mariankunirira ikantaigiri: “Maikaniroro intsonkasekatakoigajae, patirorokari irogaigakero intsonkageigakerora magatiro ashintageigarira ovashi ampogereaigakempa.”

Yogari igoveenkariegite moavitaegi onti ipaita Varaka. Inti tomintari Supore. ⁵Impo irirori itigankake inkantaigakiterira Varaame itomi Veori. Irirori onti itimi Petoreku. Ogari Petore onti onake niaku paitacharira Eoperate-shi. Antari itigankaigakerira onti ikantaigavakeri:

—Pinkantaigakerira Varaame pinkantaige: ‘Ikantimpi koveenkari Varaka ikantake: Pokaigake tovaini matsigenkaegi iponiaigaka Ejipitoku itovaigavageigityo kara yapagiteavagetanakaroty. Maika onti inaigapaake choeni. ⁶Maikari maika nokogake pimpokakera pinkishii-gakemparira kameti nagaveaigakeriniri nogipigaigavaerira, pairotari itovaigavageigake yavisavageigakena naregi, nogotaketari tyanirika piniaventak inkavintsaakenkanira inkavintsaakenkanityo, aikiro tyanirika pinkisashitakempa inkisashitakenkanityo.’

⁷Impo iaiganake itinkamiegi moavitaegi intiri itinkamiegi Mariankunirira yamageiganake koriki impunaigakerira. Impo yogonkeigapaakara ikamantageigakeri magatiro ikantageiganakeririra Varaka. ⁸Irirori ikantaigiri:

—Iroroventi pimagaigake aka impo kamani nonkamantaigakempi tyarika inkantakena Tasorintsi.

Ovashi imagaigake anta. ⁹Impo tsitenigetiku yogari Tasorintsi ikoneati-motakeri Varaame ikantiri:

—¿Tyani pokaigankitsi?

¹⁰Ikanti irirori:

—Intiegi itigankaigakerira Varaka itomi Supore, igoveenkariegite moavitaegi. Onti itigankaviigakeri inkantaigakenara: ¹¹‘Yogaegi poniaigan-kicharira Ejipitoku itovaigavageigityo kara yapagiteavagetanakaroty. Maikari maika nokogake pimpokakera pinkisa-shiigakemparira kameti nagaveaigakeri-niri nogipigaigavaerira.’

¹²Ikantiri Tasorintsi:

—Garatyo piati, aikiro gara pikisashii-gari, nokavintsajagakeritari naro.

¹³Impo okutagetetamanakera ikantaigiri:

—Maikari maika piaigae, gara nopoki. Inkantakenatari Tasorintsi: ‘Gara piati.’

¹⁴Impo iriroegi ipigaigaa ikantaigapairi Varaka:

—Yogari Varaame tera inkoge iripokakera.

¹⁵Impo yogari Varaka itigankutaaty pashini pairorira yavisaigakeri iketyorira itigankaigake. ¹⁶Iriroegi iaigake ikantaigakerira Varaame:

—Ikantake koveenkari Varaka:

‘Arisanora pimpokakenira. Gara pikanti: Gara noati. ¹⁷Noshineventasanotakempitari nompakempira tatarika oita pinevitakena. Atsi pimpokakera pinkisa-shiigakemparira.’

¹⁸Irirori ikantaigiri:

—Kañotari impenarora ivanko ishatekantakemparo perata intiri kori gara nagavei noatakera, ikantakenatari Tasorintsi: ‘Gara piati.’ Irirotari nokematsati. ¹⁹Kantankicha maika pimagaigake aka kameti nogotakera tyara inkantaena Tasorintsi.

²⁰Impo ochapinitanakera ikoneatimotairi aikiro Tasorintsi ikantiri:

—Maika pokaigaketari inkantaigakitempira piatetyo giaiganakerityo kantankicha intagatityo pinkantake tatarika nonkantakempi.

Isaankariite Tasorintsi intiri iashinote Varaame

²¹Impo okutagetetanakera yovetsikanakeri Varaame iashinote iatanakera yogiaiganakerira itigankaigakerira Varaka, ²²kantankicha ikisamatanakaty Tasorintsi ineakera iatanakera itigankakeri isaankariite itikavakerira avotsiku. Irirori iatanake ishigakotanakari iashinote itentaiganaka piteni ironampiria. ²³Impo yogari ashino ineapaakeri isaankariite Tasorintsi aratinkake avotsiku yapagotake isavurite yogiavakerira. Oga ikenake yontanampirenkanaka iatanake parikoti. Yogari Varaame ipasatutarityo yogipigavairira avotsiku. ²⁴Kantankicha yogari isaankariite Tasorintsi ariokya yarantinkake avotsiku okenara opankishiataganira ova. Ogari ova onti otantakotunkani apisotapokitene avotsi ontiri aikiro apisotapokitene.

²⁵Impo yogari ashino ineapaakerira isaankariite Tasorintsi tikaka kara ikenasanotanaketyo onampinapokiku yogontsinaanakarora tantarintsi yavinaavonkititantanakarira Varaame. Irirori ipasatutaarityo aikiro. ²⁶Impo ariokya yavisavakeri antakona anta amaavokitasanotakera. Ario pinkante tyampa iriatake ashino irontanampirenkanakempara, itikasanotakeritari ²⁷ovashi ituanake inorianakara. Ikisamatanakaty Varaame ipasatutarityo inchakiiku ton ton ton. ²⁸Impo iniakagutarityo Tasorintsi ashino iniamatanaketyo ikantiri Varaame:

—¿Matsi tyara nokantakempira nanti pipasapasatake?

²⁹Irirori ikantiri:

—Ontitari noneake pisamatsanatakenara. Nampagotakemetyo nosavurite novatuakempimetyo.

³⁰Ikantiri:

—¿Matsi tera viro shintenane? Naroni-ro pishigakotantavageta nakyara pashintaka kigonkero maika. ¿Matsi ario nokañotimpi maika omirinka?

Irirori ikantiri:

—Teraty ario pinkañotena.

³¹Impo yogari Tasorintsi ineakagakeri isaankariite ishonkavetanaka ineitarityo aratinkake avotsiku yapagotake isavurite yogiavakerira. Oगत्य ikenake yompata-kaventamatanakarityo. ³²Irirori ikantiri:

—¿Tyara okantakara pipasapasatakerira piashinote? Nantitari ineake nopokakera notikavakempira, teranika pinkematsatena. ³³Irirori ineapaakena naratinkakera avotsiku neroty yontanampirenkantakarira. Antari gamera yontanampirenka virometyo novatuake, irirori gametyo nomatiri.

³⁴Irirori ikantiri:

—Novetsikake terira onkametite, teranika nogote ario pinake viro pitikavakenara. Maikari maika terika pinkoge noatakera nompiganaetyo.

³⁵Kantankicha irirori ikantiri:

—Piatetyo giaiganakerityo, kantankicha intagatityo pinkantake tatarika nonkantakempi.

Ovashi iatake yogiaiganakerira itigankaigakerira Varaka. ³⁶Impo yogari Varaka iroto ikemakotavakerira iatake itonkivoavakarira. ... ³⁷Antari ineapaakerira ikantiri:

—¿Matsi tera nonkaemakagantempi neroty tera pimpoke? ¿Matsi pineake pimpokavetakempa gara noshineven-timpi?

³⁸Irirori ikantiri:

—Maikari mataka pokakena, kantankicha tyampaty nonkante. Intagatityo

nonkantake tyarika inkantakena Tasorintsi.

Ikantakera Varaame inkavintsajaigakerira Tasorintsi iseraeeregi

⁴¹Impo okutagitetanakera yogari Varaka yaganakeri Varaame itentanakarira otishiku paitacharira Vamotavaare ario ineventakoigakari iseraeeregi choenitakoigankicharira.

23 ¹Impo yogari Varaame ikantiri Varaka:

—Povetsikakagantakenara itagantaganirira piratsi 7 onake, impo pamakagantake 7 akamotiakyaniro toro aikiro 7 ovisha surari povetisakagantakerira.

²Yogari Varaka itsatagakero ikantakeririra impo iriroegi itagaigakeri.

Patiropage itagantaganirira piratsi itagantaigakaro paniro akamotiakyaniro toro aikiro paniro ovisha surari.

³Impo yogari Varaame ikantiri Varaka:

—Virori pinae aka onakera pitagantakarira pipira. Narori noatake kara, ariorika iripokake Tasorintsi intonkivoavakenara impo tatarika inkantakena nonkamantakempi.

Impo iatake otishiku osaamonkiitakera. ⁴Yogari Tasorintsi itonkivoavakari impo ikanti Varaame:

—Novetsikakagantake itagantaganirira piratsi onake 7. Patiropage notagantaigakaro paniro akamotiakyaniro toro aikiro paniro ovisha surari.

⁵Irirori ikantavakeri inkamantapaakeririra Varaka. Impo ikantiri:

—Maika piatae inakera Varaka pinkantakerira nokantakempirira maika.

⁶Impo irirori ipigaa ineapairi aña kara onakera itagantakarira ipira itentaigakari itinkamiegi moavitaegi.

Impo inianake Varaame, kantankicha tera inkisashiigempari iseraeeregi,

onti ikantake inkavintsaaavageigakerira Tasorintsi.

¹¹Impogini yogari Varaka ikantiri:

—¿Tyara pikantakara? Onti nokaemakagantavitakempi pinkisashiigakemparira nokisaigakerira naro. Maikari maika onti pikantake inkavintsaaavageigakerira Tasorintsi.

¹²Irirori ikantiri:

—¿Matsi gara nokematsatiri Tasorintsi nonkantakera tatarika ikantakena?

¹³Impo ikanti Varaka:

—Atsi tsame nontentanakempira pashiniku otishi pineventakoigakemparira anta, kantankicha gara pineaigiri maganiro. Onti pineagarantaigakeri kameti pinkisashiigakempariniri.

¹⁴Impo itentanakari Sopimeku ochovaankakera otishi paitacharira Pisega. Ario kara yovetsikagantake itagantaganirira piratsi onake 7. Patiropage itagantakaro paniro akamotiakyaniro toro aikiro paniro ovisha surari. ¹⁵Impo ikanti Varaame:

—Virori pinae aka onakera pitagantakarira pipira, narori noatake kara nonkamosotakerira Tasorintsi.

¹⁶Impo yogari Tasorintsi itonkivoavakari ikantavakeri inkamantapaakeririra Varaka. Impo ikantiri:

—Maika piatae inakera Varaka pinkantakerira nokantakempirira maika.

¹⁷Impo irirori ipigaa ineapairi aiño kara onakera itagantakarira ipira itentaigakari itinkamiegi moavitaegi. Yogari Varaka ikantiri:

—¿Tyara ikanti Tasorintsi?

Impo inianai aikiro Varaame ikantai inkavintsajaigakerira Tasorintsi iseraeegi.

²⁵Impo ikanti Varaka:

—Maika teranika pinkisashiigempari aikiro garatyo pikanti inkavintsajaigakerira Tasorintsi.

²⁶Irirori ikanti:

—Nokantakempiniroro intagati nonkantake ikantakenarira Tasorintsi.

²⁷Irirori ikantiri:

—Atsi tsame nontentanakempira pashiniku otishi. Ariorika inkogake Tasorintsi pinkisashiigakemparira kara.

²⁸Impo itentanakari ochovaankakera otishi paitacharira Peoro okoneatira osarigagitetapaakera. ²⁹Impo ikanti Varaame:

—Povetsikagantakenara itagantaganirira piratsi 7 onake, impo pamakagantake 7 akamotiakyaniro toro aikiro 7 ovisha surari povetsikagantakerira.

³⁰Yogari Varaka itsatagakero ikantakeririra impo itagakeri. Patiropage itagantaganirira piratsi itagantakaro paniro akamotiakyaniro toro aikiro paniro ovisha surari.

24 ¹Kantankicha yogari Varaame ineaketari ikogakera Tasorintsi inkantakera inkavintsaaavageigakerira iseraeegi teratyo iriatæ inkamosotakerira tyarika inkanteri, ontityo ikamagutanake osarigagitetapaakera ²ineaigiri iseraeegi ario inageigake kara. Impo iniakagakeri Isure Tasorintsi neroty *ikantantaarira aikiro inkavintsajaigakerira Tasorintsi.*

Ikamantantakera Varaame

¹⁰Impo ikisamatanakatyo Varaka ipatosavakotanaka ikantiri Varaame:

—Onti nokaemashivetakempi pinkisashiigakemparira nokisaigakerira naro, kantankicha maika ontiniroro pikantake inkavintsajaigakerira Tasorintsi. ¹¹Maika piataenityo pitimira. Nokantavetakempi nompakempira posantepage kametiripage, kantankicha maika garatyo nopimpi, irironiroro kañotagantakempi Tasorintsi.

¹²Irirori ikanti:

—Nomatakeroniroro nokantaigakeri pitigankaigakerira nokanti: ¹³‘Kañotari impenarora Varaka ivanko ishatekantakemparo perata intiri kori nontsatagakeroty inkantakenarira Tasorintsi. Garaty tatoita nokantumati tsikyata naro. Intagatityo nonkantake inkantakenarira Tasorintsi.’ ¹⁴Maika noataeniroro notimira, kantankicha maika tainata aka nonkantakempira tyara inkantaigakempi iseraeeregi impogini.

Impo ikantakeri impogereagakerira iragutageigakerira igipatsiegite.

²⁵Impogini iatanai Varaame itimira. Ario ikañotaka Varaka irirori iatai.

**Iseraeeregi ishineventaigakarira
Vaarepeoro**

25 ¹Impogini yogaegi iseraeeregi inaiwake Sutimeku. Ario kara ineaigakero tsinaneegi moavitaegi ²impo iroeroegi okaemaiganakeri iriaigakera ineaigoigakerira yamaiginirira itasorintsiegite moavitaegi ovashi yogakoigakari ishineventaiganakarira ikanagaventaiganakarira. ³Ario ikañoigaka maika ishineventaigakarira Vaarepeoro itasorintsiegite iriroegi, ovashi ikisaviigakeri Tasorintsi. ⁴Impo ikantiri Moiseshi:

—Pogaigakerira maganiro itinkamiegi iseraeeregi pogaigakerira impo pintsatakagantaigakenarira kutagiteriku kameti noneasanoigakeriniri nampitsimareanaempara ganiri nopogereagiri maganiro.

⁵Impo yogari Moiseshi ikantaigiri joeseegi:

—Pogaigakerira maganiro shineventaigakaririra Vaarepeoro.

⁶Impogini maganiro iseraeeregi yapatoitaigaka sotsimoroku ivankoku Tasorintsi iragaigakara. Impo ipokapai paniro iseraere itentapaaka tsinane

Mariankunirira. Maganirosanoty ineaigakeri, aikiro ineakeri Moiseshi irirori. ⁷Iroero ineaivakerira Pineese itomi Ereasare ikavirimatanakatyo ishiganaka yaganakera isavurite ⁸ikiashiiganakerira igamisapankoteku imokoroaigapaakerira piteniro. Ogari tsinane onti aganakero omotiaku. Ovashi tenige inkamaige itovaire, ataketari ikamagarantaigavetanaka ikomutagaigavetanakara. ⁹Atake ikamaigavetanaka 24,000. Yogari iriri Pineese inti itomi saserorote Aaron.

¹⁴Yogari tentakarorira tsinane Mariankunirira onti ipaitaka Sumiri. Inti tomintari Saro itinkamiegi iyashikiiganakerira Sumeon. ¹⁵Ogari tsinane itentakarira onti opaita Kosevi. Inti shintotaro Soro itinkamiegi Mariankunirira.

¹⁶Impogini yogari Tasorintsi iniari Moiseshi ikantiri: ¹⁷“Pimpogereagakerira maganiro Mariankunirira, ¹⁸iriroegi ikogaigaketari impogereagakempira viroegi neroty yamatavinaigantankempirira ikogaiganakera pishineventaganakempirira itasorintsiegite, aikiro ishinetagaiganakempiro irishintoegi. Pineaigakeroniroro maika Kosevi.”

**Ikantakerira Tasorintsi Moiseshi
irogoigaerira iseraeeregi**

26 ¹Impogini yogari Tasorintsi iniari Moiseshi intiri Ereasare itomi saserorote Aaron ikanti:

²“Maika pogoigaerira aikiro maganiro iseraeeregi pinkañotagaigakempari okyara pogoigakerira, irashirikoni pogageigakeri iyashikigeiganakerira Iroven kigonkero pintsotenkaigakerira maganiro iyashikigeiganakerira itomiegi Iseraere. Pogoigaerira maganiro surariegi gaveaigankitsirira iriaigakera iromanataigakempara, kantankicha yogari tekyarira irishiriagaikoige 20 iriro pinkante gara pogoigiri.”

⁵¹Impo yogoigakerira onti ikaraigai 601,730.

⁵²Impo yogari Tasorintsi ikantiri Moiseshi: ⁵³“Maganiro yogaegi pogoigakerira iriro pimpaigake oga kipatsi nokashigakagaigakaririra. ⁵⁴Yogari pairorira itovaigake kimota pimpaigakeri, yogaegiri ogakonarira itovaigake ogakonaty o pimpaigakeri.”

⁶⁴Maganiro iriroegi yogoigakerira tera inkonoitumatempari paniro yogotakerira Moiseshi itentashitakarira Aaron anta inaikera osarigagitetapaakera paitacharira Sunai, matakatari pogerea-sanoigaka ikamaigakera, ⁶⁵ikantaketari Tasorintsi: “Inkamaigaketyo osarigagite-tapaakera.”, neroty o ipogereasanotan-taigakarira maganiro intaganivanisano timaatsi Kareve itomi Jepone itentaarira Josoe itomi Non.

Josoe impugaerira Moiseshi

27 ¹²Impogini yogari Tasorintsi ikantiri Moiseshi:

—Pintonkoanaker otishiku

Avarimeku pineventakotakemparora kipatsi nompagakerira iseraereegi.

¹³Impo pineakerorika ovashi pinkamake pinkañotanaempari pirenti Aaron ikamakera, ¹⁴teranika pinkematsaigena-nika nokantaigavetakempira tyara pinkantaigakero imperita pogikonteai-gakenerira nia iseraereegi inaikakera anta osarigagitetapaakera paitacharira Sun, onti pikisaiganaka. ...

¹⁵Irirori ikantiri:

¹⁶—Vintitari Tasorintsi ganiaigiririra maganiro, maika nonkantakempi atsi pinkogakagaera pashini pugaenanerira ¹⁷tentaigaemparineririra yogaegi iseraereegi inkantakanira irimutakova-geigaeri irisentaigaerira ganiri ikañoi-gari ovisha terira intime sentaigiririra.

¹⁸Impo ikanti Tasorintsi:

—Yogari Josoe itomi Non iriro pugaempine, nagaveakagakeritari inkañotakerora pikantakerira maika.

¹⁹Iriro pintentanake inakera saserorote Ereasare impo irapatoventaigakemparira maganiro iseraereegi kameti ineakoigakerira pimpatikaitakerira igitoku pinkantanarira iriro pugaempine.

²²Impo irirori itsatagakero ikantakeririra Tasorintsi. Itentanakari Josoe inakera Ereasare intiegiri maganiro iseraereegi. ²³Impo ipatikaitakeri igitoku ikantanarira iriro pugaerine, ariotari ikantakeri Tasorintsi.

Iseraereegi ipogereaigakerira Mariankunirira

31 ¹Impogini yogari Tasorintsi iniairi Moiseshi ikantiri:

²“Maikari maika pinkenkiventaigakerira iseraereegi pintigankaigakera iromanataigakitemparira Mariankunirira impogereai-gakerira. Impogini pinkamake.”

³Impo irirori iniaigakeri maganiro iseraereegi ikantaigiri: “Povetsikaigana-kempara piatarantaigakera pomana-taigutemparira Mariankunirira pinkenkiventaigakerira Tasorintsi.”

⁶Impo itigankaigakeri iaigakera ... ⁷yomanataigakarira Mariankunirira ipogereasanogakerityo surariegi, itsatagaigakero ikantakeririra Tasorintsi Moiseshi. ⁸Yogaigakeri aikiro igoveen-kariegi Mariankunirira 5 inaigake. Irirorogi onti ipaiigaka Evi, Erekeme, Soro, Oro, intiri Ireva. Imatunkani aikiro Varaame itomi Veori imokoroin-kani.

Inevitantaigakera kipatsi iyashikiiganakerira Iroven intiri Gare

32 ¹Yogaegiri iyashikiiganakerira Iroven intiegiri iyashikiiganakerira Gare yashintavageigakatyo tovaini ivakane intiri irovishate. Impo antari ineagakerora Jasere ontiri Garaare okametigitetakera otimantakarora isekashi piratsi ikantaigake:

—Kametimatake antimaigakera aka ampiravageigakempara.

²Impo iaigake inakera Moiseshi intiri saserorote Ereasure intiegiri aikiro itinkamiegi iseraereegi ikantaigiri:

⁴—Notinkamiegi, ogari kipatsi nagapi-tsaikeririra amoreoegi okametigiteva-getiratyo kara otimantakaro isekashi piratsi. Naroegiri aiño tovaini nopiraegi, ⁵irorotari maika nokogaigake nonkantaigakempira virorika kogankitsine pimpaigakenarora nashintaigakemparora nontimantaigakemparora ganiri nomonteaigaro Jororan.

⁶Yogari Moiseshi ikantaigiri:

—¿Matsi ario inti aigankitsine pitovai-reegi iromanataigakempara viroegi gara piaigi? ⁷Pinkañoigakerorika maika gara ikogaigi pitovaire iriaigakera intimaigakera anta kipatsiku ikashigakagaigakari-rira Tasorintsi. ¿Antari gara pikañoigiro maika? ⁸Pikañotasanogakari tomintaigakempirira pairani nonaigavetakara Kareshi-vareneaku notigankaigavetakarira inegiteaigakiterora. ⁹Iaigavetaka yogonkeigavetaka otsateniku paitacharira Esekori ineageigavetutaro magatiro, kantankicha impo ipigaigavetanaara onti yomintsarogaigapaakeri maganiro ovashi itatsiigapaaka tera inkogaige iriaigakera intimaigakera anta. ¹³Impo ovashi ikisaigakeri Tasorintsi maganiro yogipigaigairi yanuiintevageigakera anta osarigagitetapaakera 40 shiriagarini kigonkero ipogereaigakara maganiro kañoigakerorira maika. ^{d 14}Maikari maika viroegikya kañoigakero maika tera pinkogaige piaigakera, atanatsi potsimajaigirira Tasorintsi. ¹⁵Maika garika piaigi irogipigaigaerityo maganiro iranuiinteva-geigaera anta osarigagitetapaakera impogereaigakempara, viroeginiroro kañotagantaigakerine.

¹⁶Kantankicha iriroegi yaiñoniigana-kari ikantaigiri:

—Gara nokañoiga maika. Onti oketyo novetsikashiiganakeri nopiraegi ontiri aikiro novetsikaiganake novankoeigi intimantaigaemparira notomiegi. ¹⁷Naroegiri novetsikaiganakempara noaigakera nontentaigakemparira notovaireegi nomanataigakempara kigonkero irashintaigakemparora kipatsi intimantaigakemparora ario nompigaigae. ...

²⁰Yogari Moiseshi ikantaigiri:

—Iroroventi ariora pinkañoigakero maika kametitaketyo, ... ²³kantankicha antari garika pitsatagaigiro pikantakerira ario pinkante inkisaigakempityo Tasorintsi, ineigakempitari onti povetsikaigake terira onkametite.

³³Impo ovashi ipaigakeri magatiro oga kipatsi yagutaigakeririra Seon igoveenkariegite amoreoegi intiri Ogo igoveenkariegite Vasankunirira itentagantakarora magatiro apatogetakara pankotsipage timagetatsirira kara ontiri aikiro kipatsi kuatakogetakarorira. Yashintaigakaro iriroegi intiri aikiro iyashikiiganakerira Manaseshi itomi Jose, kantankicha tera maganiro irashintaigemparo iyashikiiganakerira Manaseshi, *impoginitari imontegarantainaka intati Jororan itimaigakera anta.*

**Ikantakerira Tasorintsi iseraereegi
impogereaigakerira maganiro
timaigatsirira Kanaanku**

33 ⁵⁰Antari aiñokyara inaigake Jororanku okatinkatakotakera Jeriko yogari Tasorintsi iniairi aikiro Moiseshi ikantiri:

⁵¹“Pinkantaigakerira maganiro iseraereegi ikantake Tasorintsi: ‘Antari pimonteiganakerora Jororan piaigakera anta Kanaanku ⁵²⁻⁵³oketyo poneagaiga-

kempari timaigatsirira kara pimpogereai-gakerira pintimantutaigakemparira igipatsite, narotari paigakempiro pashintaigakemparora. Antari pimpogereai-gakerira pimaiganakerityo itasorintsiegite aikiro, pintimporokagetutaigakerira maganiro yovetsikantageigakaririra mapu ontiri asuro. Pimageigakerora

aikiro yovetsikageigakeneririra itasorintsiegite otishipageku. ⁵⁵Antari garika pipogereaigiri onti iroverajaigakempi impogini iromanataigakempira iratsipe-reagavageigakempira. ⁵⁶Impo naro garatyo iriro nokisashiiga, vintiegityo nantsipereagavageigakempa nompogereai-gakempira.’”